

# Juan Jesús Chanīmara Faafo Kirika Kenexō Fomani

*Jesús noko nimasharaino nō afe īpaxanō*

<sup>1</sup> Ņkī Juan, ē mato kirika kenexō fomai mā tāpinō. Jesucristo ē ūimisxaki ē mato yoi māri mā tāpisharanō. Nā Jesucristo nōko Ifokōi tae fenakōi Nios fe iyopaonixakī. Akka Niospa afama mīshti onifamatai afe iyopaonixakī, chipo nāmā fotoxō noko yoiaito nō nikamis. Oa yorakōi keskara nō ūimis. Mā ūikī feyafaxō nō ramāti nōko mīfi. Nāskakē noko yoiaito nikayamexakī ē mato yoi, noko imasharanō nō afe īpaxanō. <sup>2</sup> Apa Nios ariax nokoki Jesús fotoni. Fotokē nō ūikī feyafani. Nāfi afeskapishta nakama, nāfi nīpanakakī. Apa Nios fe ikatsaxakī nokoki fotoni. Nāskakē nā nō ūia keskara nō mato yoi. <sup>3</sup> Nō ūipaonixakī nō mato yoi noko yoiaito āfe meka. Nāskakē nofe rafexō nā nō shināi keskarari māri mā shinātiro. Nios feta āfe Fake Jesucristo shināi keskafakī nōri anori nō shināi, nō ato fe rafekōitiro. <sup>4</sup> Nāskakē ē mato kirika kenexō fomai nā kirika kene ūiax mā inimakōinō.

*Nios xafakīakōi ika oa luz keskara*

<sup>5</sup> Akka noko Cristo yoiai, anori ē mato yoinō. “Oa xinī chai chaxaino fakishtiroma keskara, xafakīakōi Nios ika. Afaa chaka afe rafemisma,” ixō Cristo noko yoimis. <sup>6</sup> Akka anorima shināi yora fetsafo iskakani: “Ē Nios fe rafea,” ifiaxō a Niospa yoiai anori shināima āa chanī anorima yoi. Āfe ūiti sharama xafakīakōi ikama, fakish

keskara a Niospa yoiai anori shināyamafi. <sup>7</sup> Nios xafakākōi ikakī, afaa pishta chakafamisma. Āfe ōiti mēra oa fakish keskarama, xafakā sharakōi ika. Akka nōri afe rafekōixō, nō āfe meka nō mēra nanekōixō, Niospa shināi keskafakī nōri nō shinātiro. Nō askara shināx, nā Ifofaafō fe nō ato fe rafetiro. Nāskax nō xafakākōi nitiro, Niospa Fake Jesúsmāi noko nāxonikē. Āfe imī nōko chaka noko soaxōfafāini keyokōi.

<sup>8</sup> Akka nō yoikī iskafamis: “Ē afaa chakafamisma,” ifiax nōa nō pāramemis. Nāskax nōa nō chanīkōimis. Nōko ōiti mēra Niospa meka naneama. <sup>9</sup> Akka nō afara chakafaxō nōko chaka nō soapaikī, nō Nios yoiato nōko chaka noko soaxotiro. Keyokōi noko soaxotiro noko rae-fakī, Niosmāi mēstekōi isharakōixō. <sup>10</sup> Niospa yoimis: “Keyokōi yorafāfe chakafamisfo,” noko famis yoikōikī. Noko askafafaino, “Ēkai afaa pishta chakafamisma, ē chaka shināima,” ixō yoikī nō Nios chanīmara faima, “Āa chanīra,” nō Nios fai. Nāskakē āfe meka nōko ōiti mēra naneima.

## 2

### *Jesús Apa Nios noko yoixoni*

<sup>1</sup>Efe yora mīshtichi, ē mato shināi. Mē mato Jesús Ifofamaxō ē mato fakefai. Mato fakefaxō ē mato kirika kene fomai, mā anā afarafo chakafanōma, shināsharata mā inō. Askara Niospa fichipai. Akka nō chakafaino Niospa fichipaima. Nāskakē nō anā afara chakafaxō nō nōko Ifo Jesucristo nō yoitiro anā nōko chaka nō soapaikī, nokomāi nikaito. Noko nikaxō Apa Nios noko yoixoni iskafakī: “Epa, ē ato nāxoni. Eōxō ato chaka soaxōfe, āto

chaka soapaikani kiki,” Apa fatiro. Nā fistimāi mēstekōi ixō, afaa chakafamisma. Nāskaxō Apa Nios noko yoixotiro. <sup>2</sup> Noko nāxoni nōko chaka noko soaxoxiki. Noko fistima, keyokōiōnoax noko nāxoni. Nōko Ifo Jesucristo noko nāxoni. Nōko chaka noko soaxōfaini nanī.

<sup>3</sup> Nāskakē Cristo noko yoiai keskafakī nō nikakōixō nō tāpisharakōitiro nōmāi afe rafexō. <sup>4</sup> Yora fetsafo iskai: “Ē Cristo fe rafea,” ifiaxō āfe meka nikama, āa akikiri kētapamis, mēstekōi ikama. <sup>5</sup> Akka nō Niospa meka nikakōikī nō aō noikōi. Nāskafaxō nō tāpitiro nō afe rafekōia, Nios fe. <sup>6</sup> “Mē Nios fe rafekōiaki,” ixō yoi, a Jesús imis keskara ikāfe.

### *Noko meka fena shara yoini nō nōināsharakōinō*

<sup>7</sup> Efe yora mīhtichi, ē mato yoisharakī ē mato kirika kenexoni. Na ē mato yoiai keskafakī taefakī mā mā nikamiskī. Jesús noko yoia keskafakī ē mato kenexonō. <sup>8</sup> Mā mā nikafimiskē, ē mato anā fenafakī yoinō chanīma. Jesucristo noko noikōi. Nāskari fakī nō fetsafo noikōi. Fetsafo noikī, nōko ūiti mēra xafakīakōi iki. Anā fakish keskara ikima. <sup>9</sup> Akka, “Ē Nios fe rafea ē xafakīakōi ika,” ixō nō yoifixō nofe yorafo nō noikaspamis, nōkai xafakīakōi ikama. <sup>10</sup> Akka nōroko nofe yorafo noi, nō xafakīakōi iki. Nō shināsharata nō ikax, nō anā fenotirona. Nāskakē nō xafakīakōi iki, afaa pishta chaka shinātama. <sup>11</sup> Akka a afe yorafo noikaspifo, afokai sharama. Fakish mēra niafo keskara. Afaakai shinākanima. Āto chaka xatekaspakani. Askafikaxō afaa tāpiafoma, fenokōiafo.

<sup>12</sup> Efe fakefāfe, māto chakafo Jesúsxō Epa Niospa mato soaxonano, nāskakē ē mato shinākī ē mato

kirika kenexoni. <sup>13</sup> Afaa oniataima Epa Nios fisti iyopaoni. Efe anifo tiito, ē mato kirika kenexoni, afe keskaramāki mā mā Epa Nios tāpiakī. Mā mā tāpixō mā chanīmara famiski. Naetapafāfe, matori ē kirika kenexoni, Satanás chakata mato afara chakafamapaiyaito mā mā finōfakī. Nāskakēri naetapa tiito ē mato kenexō fomai, mā Satanás chaka finōano. Efe fakefāfe, ē mato yoikīkenexona māmāi Epa Nios tāpikē.

<sup>14</sup> Efe anifo tiito, matori ē kirika kenexona, mā mā tāpiakī, afaa oniyataima Epa Nios fisti iyopaoni. Naetapafāfe, matori ē kirika kenexona, mātō ūiti kerexkōifafāi Epa Nios āfe meka shara nikakōiyanā mā mā Satanás chaka finōfakī.

<sup>15</sup> Akka a Niospa fichipaiyamai, nōri fichipaitiroma. Afo fichipaikī nō Nios shinātiroma. Afarafo na yora chakafāfe āto shinā mēraxō shināifo keskara afo fichipaiyamakāfe. Afo fichipaikī mā Nios shinātiroma. <sup>16</sup> Akka a Nios shināifoma nono nāmā ikafo āa shinākani iskamisfo: “Ea ē shināxō nā ē apaiyai keskara ē atiro. Afara ūikī ē fichipaikī ē fitiro. Ē tsoa keskarama. Ē afama mīshti shināi. Ea keskara tsoama,” ixō fētsa yoitiro āa chanīkī. Aato Niospa meka shināima, āa shināx askatiro. <sup>17</sup> Akka na afe keskararafo Niospa ūikaspaifo mā afo mitokomei. Nāskatari a yora chakafāfe fichipaiyaifo mā afori mitokomei. Akka nā Niospa yoiai keskara nikakōiāx nō Nios fe nīpanaka.

*A yora chanīaifo nō nikatiroma*

**18** Efe fakefāfe, mā chaima Jesucristo anā nāmā fotoiyoi mā nō niaka. Nāskakē Jesús nāmā fotoyoamanoo, akka nā yora chakafāfe Cristo shināmisfoma āto xanīfo finakōia oi taei. Nāato, “Ē Cristora,” ixō noko pārapaixii. Mā mā tāpia nāato Jesús noikaspamis. Akka iskaratīa, “Ē Cristora,” ikanaifo yora ichapakōifo. Nāskakē mā nōri tāpia nā Cristo kayakōi samama fotoi. **19** Nā Cristo noikaspaiifo nofe iyoafō, mā noikaspakanī nomakinoax tsekeafō. Afokai noko keskara foma. Cristo anā shinākanima, mā kachikiri faafo. Nāskax nomakinoax tsekeafono nō tāpitiro afāfekai Cristo Ifofaa foma. Akka a Cristo āto Ifokōikē nomakinoax tsekekeranafoma.

**20** Akka Cristo āfe Yōshi Shara māto ūiti mēra nanea. Nāskakē keyokōichi mā mā tāpia Niospa Yōshi Sharapa mato tāpimapaiyai keskara. **21** Nāskata Jesucristo mā tāpikī finakōiakī. Tāpixō mā mā chanīmara fakī. Nāskakē ē mato kenexoni. Nāskaxō afara mato pāraifāfe mā chanīmara faima. Mā tāpia Jesucristo ramashara anorima ato yoimisma, nāfi chanīmakōikī. **22** Yora fetsafo iskamisfo: “Cristokai Niospa nai mēraxyō nīchinikeroko, akai Niospa Fakekēroko,” ixō yoimisfo. Askafakaxō Epa Nios yafi āfe Fake Jesús chanīmara fakanima. Afāfe Cristo noikaspakōikani. **23** Akka nā Cristo noikaspaiifāfe iskafakani: “Jesús Niospa Fakema,” fakanax Epa Nios fe rafemisfoma. Afokai Niospa yorafoma. Akka a yoikī iskafaifo: “Jesús Niospa Fakekōi,” fakanax nāfo Nios fe rafekani.

**24** Nāskakē Jesúsnoa mā nikakī taefani keskafakī, āfe meka shara shināmakiyamakāfe. Nā mā

nikakī taefani keskafakī, mā shināmakiyamax mā nikakōisharaino Epa Nios fe āfe Fake Jesús mato fe rafelekōipakenaka. <sup>25</sup> Nāskakē Jesús noko iskafakī yoiyoni: “Ea yafi ēfe Epa mā Ifofaax, mā nofe nīpanaka, anā mā nanakama,” ixō noko yoini.

<sup>26</sup> Akka na yorafāfe Cristo noikaspaifo afāfe mato pārapaikani. Mato anorima yoipaikani. Nāskakē ē mato yoisharakī kirika kenexoni mā tāpikōinō tsōa mato pārayamanō anorima yoikī.

<sup>27</sup> Akka Epa Niospa āfe Yōshi Shara mato ināni mato fe rafelekōinō. Nāskakē aōxō mā mā tāpikōia. Mā anā tsoa yopaima mato tāpimanō, āfe Yōshi Sharapamāi keyokōi mato tāpimakē. A mato tāpimanai keskara chanīmakōi, mato pāratiroma. Nāskakē nikakōianā Cristo fe rafesharakōikāfe, a Niospa Yōshi Sharapa mato yoiāi keskai. A Niospa Yōshi Sharapa mato yoini keskai shināmakkakīma Cristo fe rafesharakāfe enekakīma.

<sup>28</sup> Ēfe fakefāfe, iskaratā Cristo nikakōianā afe rafelekōikāfe, mā nāmā fotofaino nō akiki mesimakai nōmāi isharakōiax. Askatari nō akiki rāfimakai.

<sup>29</sup> Mā mā tāpiakī Nios isharakōimiskī afaa chakafatama. Nā isharakōimisfo nāfo Epa Niospa imasharapakenaka āfe fakefo inō. Nafofi Epa Niospa fakekōifokī.

### 3

#### *Niospa fakefo*

<sup>1</sup> Epa Niospa noko noikōi. Shināfāi ikāfe. “Ēfe fakefora,” noko famis. Akka nō āfe fakekōifo. Akka nā yora fetsafāfe Jesucristo shināifoma Nios tāpiafoma. Nāskafakīri nokori tāpiafoma, nō Niospa

fakefofiano. <sup>2</sup> Efe yora mīshtichi, ea nikakāfe. Nōfi iskaratīa Niospa fakekōifokī. Nāskakē afe keskarara chipo noko Niospa imai nō tāpiama. Cristo fotoaito nō ōiax nā keskarakōi nō iki, āfe ōiti keskarakōi. <sup>3</sup> Niospa fakekē nonori nō yoi: “Ē Jesucristo fe ipanaka. Ē Jesús fe ikaino āfe ōiti keskarakōi ē ixii,” ixō shinākī nō anā chaka shināpaima. Jesucristo shināi keskarari nō shinātiro, anā chaka shināyamakī.

<sup>4</sup> Akka yora fetsafāfe ato chakafakakī, āto chaka potakaspakani, a Niospa yoiai keskara shinākanima, afara chaka fisti shināmisfo. <sup>5</sup> Jesucristo nai ariax nokoki fotoni nōko chaka noko soaxoxiki. Akka nāatofi afaa chakafamismakī. Nā fistifi finakōiakī. Ē mato yoiai keskara mā mā tāpiakī. <sup>6</sup> Nāskakē a afe rafeafāfe chaka shināmisfoma. Akka a ōiti chakayaafāfe Jesús tāpafoma, Jesús shinākanima. Jesús fe rafeafoma. <sup>7</sup> Ea nikasharakāfe, ē mato yoinō. Fetsa iskatiro: “Ē Niospa meka mato yoinō,” ixō mato yoisharaima. Mato anorima tāpimapai, akka aa nikax mā chaka nitiro. Akka a isharakōixō shināsharamis. Aa keskarafi yora sharakōikī. A Cristo ika keskarari ari isharakōia shināsharakōita. <sup>8</sup> Akka nā afara chakafamisfo Satanás fe rafeafo. Nā Satanásmāi taeyoi ōiti chakaya inino, iskaratīari nāskara. Nāskaxō Satanás keyokōi yorafo afara chakafamapai. Nāskakē Niospa āfe Fake nokoki nīchini. Noko nāxoxiki nokoki fotoni, nōko chaka noko soaxoxiki. Nomakinoa Satanás potatiro noko afara chakafamapaiyaito. Nāskakē Jesucristo Satanás finōinīfofana.

<sup>9</sup> Akka Niospa āfe Yōshi Shara nōmēra naneano

nō Niospa fake itiro. Nō Niospa fakexō nō anā afaa chakafapaima. Nā Niospa Yōshi Shara nōko ōiti mēra ikē nō anā afaa chakafatiroma, nōko ōiti noko fetsafaano. Nōko ōiti noko fetsafaxō, mā Niospa noko fakefa. <sup>10</sup> Fetsafāfe afara chakafamisfo, afokai Niospa fakefoma. Afofi aa ranā noinākanima. Askarafo Niospa fakefoma. Afofi Satanás fakefoki. Nāskakē Satanás fakefo nō tāpitiro. Nāskafakīri Niospa fakefo nō tāpitiro.

*Nōa ranā nō noinātiro*

<sup>11</sup> Nāskakē taefakī mā Nios Ifofaxō mā mā nikamiskī mato yoiaito: “Nōa ranā nō noināsharanō,” ixō mato yoiaito mā mā nikamis. <sup>12</sup> Akka nā Caín onefetsa noikaspakī reteni keskara iyamakāfe. Askara Satanás chaka fe rafea. Nāskaxō onefetsa reteni noikaspakī, ē mato yoinō nikakapo. A Niospa yoia keskafakī onefētsa Nios shināni. Akka Caín askanima. Āfe onefetsaki ōtitishkikī reteni. A onefētsa Nios Ifofaito ōikī noikaspakī reteni, Niosri noikaspayanā. <sup>13</sup> Akka māri Jesús Ifofaito, matori noikaspatirofo. “Ē Jesús Ifofaito ea tsōa noikaspaima kiki,” ixō shināyamakāfe. A mā Jesús Ifofaito a Jesús Ifofaafāfema mato noikaspatirofo. <sup>14</sup> Nō yorafo noikōixō nō tāpitiro nōmāi Niospa fakefoxō. Nāskakē a omiskōipakenakafo mēra katama, afe nō ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama. <sup>15</sup> Akka a yorafo noikaspaiifo afofi retemitsamis keskarafoki. Afo chakakōifo. Askarafo mā mā tāpia Niospa fakefoma. Askarafo Nios fe rafeafoma. Nios fe nīpanakafoma, yorafo noikaspakanax. <sup>16</sup> Akka Jesús noko noikōikī, noko

nāxoni. Āakōi nokoōnoax nani. Nāskarifiakī nō fetsafo noikōiax nō atoōnoax natiro. <sup>17</sup> Akka afama mīshti ichapayafixō, fetsafāfe afara yopaito nō ato afaa ināmā, askara sharama. Epa Niospa noko noiai keskafakī, nō ato noima. <sup>18</sup> Efe yorafāfe, ea nikakōikāfe, ē mato yoinō. Fetsafo iskakani, ãa chanīkani: “Ēfi yorafo noikai,” ifiaxō ato chakafakani, atokai noikanima. Akka nōfi askaramakī. Nō yorafo noisharakōixō nō ato shara fatiro.

### *Nō Nios nikasharax nō akiki ranotiroma*

<sup>19</sup> Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anori shināi nō akiki meseima. <sup>20</sup> Nāskafixō nōko ūiti mēraxō nō shinākī iskafatiro: “Ē afara chakafaa,” ixō nō shināito Niospa noko ūi. Noko ūikī tāpia a nō shināi keskara. Nāskakē nōko chaka nō soapaiyaito nōko chaka noko soaxotiro. Nios nōko ūiti keskarama. Aato keyokōi tāpia. <sup>21</sup> Efe yora mīshtichi, ea nikasharakāfe. Nōko ūitinī nō shināi iskatiro: “Ē Nios Ifofaito ēfe chaka mā ea soaxona, mā ea shināsharamana,” ixō shināi, nō Nios fe rafetiro, nō akiki nō ranotiroma. <sup>22</sup> Nō askaino Epa Nios nokoki inimatiro. Nāskakē nā nō yōkai keskara noko inātiro, a noko yoiai keskaramāi nō nikasharaito, askatarimāi nō inimamasharaito. <sup>23</sup> Iskafakī noko yoini: “Ēfe Fake Jesucristo nikasharakōikāfe,” ixō noko yoini. Nāskatari a noko yoini keskai nōa ranā nō noināsharai. <sup>24</sup> Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa ãfe Yōshi Shara

nokoki nīchini. Aōxō nō tāpitiro Epa Nios nofe ikaito.

## 4

*Niafaka chakata Niospa Yōshi Shara noikaspai.  
Askatari Cristo noikaspai*

<sup>1</sup> Efe yora mīhtichi, fetsafāfe mato anorima yoiaifāfe ato nikayamakāfe. Iskafakī mato yoipaikani: “Nō mato Niospa meka yoi Niospa noko shināmanaino,” ifiakaxō anorima mato yoimisfo. Askaifono Niospa meka ōikī mā tāpitiro a yoiaifo keskara chanīmamākī. Niospa Yōshi Sharaōxō mato yoikanimakī. Akka afokai Niospa ato afaa yoiama. <sup>2</sup> Nāskakē ē mato yoisharai, ea nikakāfe. Fetsafāfe a Niospa meka mato tāpimasharaito mā tāpitiro. Niospa Yōshi Shara a mēra naneano yoiaito mā tāpitiro. Iskara mato yoiaito: “Jesucristo fotoni Apa ariax nai mēranoax. Nāfi yora keskara kāiniki. Aafi yorakōiki,” mato faito mā tāpitiro Niospa shināmanaino mato askafakī yoiaito. <sup>3</sup> Akka yora fetsafāfe anori yoiyamaifāfe nō tāpitiro afāfe Jesucristo noikaspamisfo, Niospa Yōshi Shara āto mēra naneama. Satanás ato shināmamis. Akka a Cristo noikaspai noko ano fexikani mā mā nikamis. Akka iskaratā mā noko ano feafo, afāfe Cristo noikaspamisfo.

<sup>4</sup> Akka māroko askaramakī efe yorafāfe, Niosfi māto Ifokōikī, māfi Niospa yorakōifokī. Āfe Yōshi Shara mā māto ūti mēra nanea. Akka a anorima shināifo askarafoma, Satanás yōshi āto ūti mēra nanea. Akka Niospa Yōshi Shara mato mēra naneano mā Satanás finōkōia. <sup>5</sup> Akka fetsafāfe

Nios tāpiafomano, nāskakē anorima ato yoimisfo, Satanás ato shināmanaino. Nāskakē Satanás ifofaaafāfe ato nikamis Satanásmāi āto ifokē. <sup>6</sup> Akka nōfi Niospa yorafokī. Nāskakē a Nios tāpiafāfe noko nikakōitirofo nō yoiai anori. Akka a Nios Ifofaafāfema a nō yoiai anori nikatirofoma. Akka nō tāpitiro ato mēra Niospa Yōshi Shara naneano noko nikasharaifono. Ato mēra nanexō fanīrirā ato shināmania. Akka a noko nikaifoma ato mēra Satanás nanea. Satanás ato mēra nanexō fanīrirā ato shināmani. Satanás chanī finakōia. Nāskax ūti chakaya.

### *Niospa noko noikōi*

<sup>7</sup> Efe yora mīshtichi, nō noinākōinō, Niospa noko ato noimanō. Nios fistichi noko shināmatiro nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko ūti mā noko fetsafaano. <sup>8</sup> Niospa yorafō noikōia. Nāskaxō ato noikī noko tāpimatiro. Akka a yorafō noiaifāfema, Nios tāpiafoma. <sup>9</sup> Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatiro, nāatomāi nōko chaka noko soaxomiskē. Nāskakē Niospa noko ūimani afeskaxō noko noimākai. <sup>10</sup> Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

<sup>11</sup> Akka efe yora mīshtichi, Epa Niospa noko noikōi. Nāskakē nōa ranā nōri nō noināsharakōikāfe. <sup>12</sup> Akka tsoa pishta Nios ūimisma. Nāskafiax nō noināino, Nios nōmēra ika. Nofe ixō yorafō noko noimasharatiro. <sup>13</sup> Niospa āfe Yōshi Shara nōmēra ikimakē nō tāpitiro nō Nios

fe rafea, Nios nofe ikano. <sup>14</sup> Epa Niospa nai arixõ ãfe Fake noko nãmã nãchixoni. Æfe Fake nãmãnoa nõ õipaoni. Õipaonixakõ nõ ato yoimis iskafakõ: “Epa Niospa ãfe Fake noko nãmã nãchixoni, keyokõi nokoõnoax nanõ nõko chaka noko soaxoxiki noko ifiano nõ afe ipaxanõ.” <sup>15</sup> Fetsa iskai: “Jesúsfi Niospa Fakeki,” ixõ shinãi. Aafi Nios fe rafeakõ Nios afe ikano.

<sup>16</sup> Niospa noko noikõia mã nõ tãpia, nõ chanõmara faiyanã, Niospamãi noko noimiskẽ. Nõ Nios chanõmara faito nofe rafexõ noko yorafo noimatiro. Akka nõ ato noikõiaino Nios nofe ika, afe nõ rafekõia. <sup>17</sup> Nõ Nios noi. Nõ Nios noikõ finakõiax nõ inimatiro Jesús anã nãmã fotoano. Anã fotoxõ noko iskafatiro: “Nã ea Ifofaafo tii ëfe Epa Nios ari fokani. Akka nã ea Ifofaaform tii ëfe Epa ari fokanima, nã omiskõipakenakafo mëra fokani,” ato fatiro. Ato askafaino nõkai Nioski meseima. Nõ ranjima nõ afe rafekõi. Afe rafei nõ Jesús keskara iki, ãfe õiti keskara nõ iki. Nãskakẽ Jesús oaitã nõ akiki meseima. <sup>18</sup> Nõ Nios noikõiax nõ akiki mesetiroma. Nõko shinã mëraxõ nõ Nios noikõ finakõixõ nõ rate potatiro. Akka fëtsa mesekõ iskafai: “Niospa ea omiskõimani,” ixõ shinãi aatokai noikõ finakõiama. Ato noikõiamax Nioski mesetiro.

<sup>19</sup> Nõ Nios noiyamatai noko noikõ taefani. Akka noko taefakõ noinikõ iskaratõi nõri nõ aõ noi. <sup>20</sup> Akka fetsafo iskakani: “È Nios noi,” ifiaxõ a Nios Ifofaafo noima, anorima yoimisfo. Mã afe yorafo õifikõ atokairoko noikatsaxakakõ, Niosri noisharakanima askara õiroko fakatsaxakakõ. <sup>21</sup> Niospa noko yoimis: “Ea noixõ nã ea Ifofaafori noikãfe,” noko famis.

## 5

*Nō Nios Ifofakē tsōa noko afaa chakafamatiroma*

<sup>1</sup> Jesucristo Niospa Fakekōi. Nokoki nīchini noko nimapakexanō, nōko Ifo inō. Akka nō a chanīmara fai nō Niospa fakefo itiro. Nāskaxō āfe Apa Nios nō noixō, āfe Fakeri nō noikōitiro. <sup>2</sup> Nō Nios noikōikī noko yoiai keskara nō nikai. Nāskaxō mā nō tāpia nō Niospa fakefori noikōi. <sup>3</sup> Nō Nios noikōixō āfe meka nō nikakōikī a noko yoiai keskara nō nikai nō fekaxteima. <sup>4</sup> Nāskakē nō Epa Niospa fakexō afara chakafāfe noko amapaiyai keskarakai nō atiroma. Niospa Fake Jesucristo chanīmara faxō afarafāfe noko afara chakafamapaiyai keskara nō finōtiro. <sup>5</sup> Afara chakafo noko amapaiyaifo keskara Niospa noko amatiroma nō anōma. Nāskaxō Jesucristo Niospa Fake nō chanīmara faxō aōxō na chakafo nō finōtiro anā afaa chakafaxikima. Nā chanīmara faafāfe finōtirofo.

*Niospa āfe Fakekōi noko ūimani*

<sup>6</sup> Mā nō tāpia Niospa āfe Fake feronāfakekōi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakī: “Nafi ēfe Fakeki,” ixō yoini. Jesús naino āfe imi foaino Apa Niospa noko tāpimanī āfe Fakemāiakē. Āfe Yōshi Shara chanīmisima nōmēra nanexō noko yoimis Jesús Niospa Fakekōi. <sup>7</sup> Nā trespato yoimisfo Jesús Niospa Fakekōi. <sup>8</sup> Jesús faka mēra maotisani shināta, askatari naino āfe imi foni shināta, askatari Niospa Yōshi Sharapa noko yoaino, nānorifos nā trespa shināmisfo. <sup>9</sup> Akka

yorafāfe noko afara yoiaito ato chanīmara fata a Niospa noko yoiairi nō chanīmara fakī finakōitiro. Akai yora keskarama, afi Nioskōikī. Akka āfe Fakeōnoa noko yoiaito nō chanīmara fakōitiro. <sup>10</sup> Akka Niospa Fake chanīmara faxō Apa Niospa aōnoa yoini keskara āfe ōiti mēraxyō chanīmara fatirofo. Nāskafekē āfe Fakeōnoa yoimis keskara tsōa chanīmara fayamaxō, “Nios chanīra,” fakaxō yorafo fanīrira shināmapaikani. <sup>11</sup> Nāskakē Nios iskamis: “Ē mato nimasharapaketiro ēfe Fake Jesūsxō,” ixō noko iskafamis. Nāskakē nō Jesús Ifofaax nō afe nīpaxatiro. <sup>12</sup> A Niospa Fake Ifofaifo afe nīpaxatirofo. Akka a Ifofaima afe nīpaxatirofoma.

### *Mā mekai xatekī ato yoisharani*

<sup>13</sup> Mā Niospa Fake chanīmara faaki. Nāskakē ē mato kirika kenexoni, mā tāpinō mā afe nīpanaka.

<sup>14</sup> Nō afara sharafo nō fichipaikī, a Niospa noko shināmanaino, nō Nios yoitiro kīfikī, a Niospa fichipaiyai keskafakī. Nō askakī nō tāpitiro Niospamāi noko nikasharamiskē. <sup>15</sup> Nāskakē nō tāpitiro a nō Nios yoiaito noko nikaito noko nikaxō noko afara inātiro nō yōkaito.

<sup>16</sup> Akka a Nios Ifofaa fētsa afara chakafaito ōikī, a Nios Ifofaa fētsa Nios kīfixotiro āfe chaka xatenō. Akka Epa Niospa ato nimatiro isharapakexanōfo. Askafikanax fetsafāfe oa Nios Ifofaafo keskara iyokanax mā potakaxō chaka shināfafāikakī Nios kachikiri fakōinafo. Askarafokai tsōa ato ni-matiroma nīpaxanōfo. Naax omiskōipakenakafo mēra fokani. Atoōnoa Epa Nios kīfixokāfe ixō ē mato yoiam. <sup>17</sup> A Niospa noko yoiai keskara nō nikayamaxō nō chaka shināi. Askafixō anā nō

chaka xatepaiyaito ōikī nōko ūiti noko fetsafax-otiro, nō anā chaka shināpaimanō.

**18** Mā nō Nios Ifofaano, noko fakefai. Nō ūfe fake ixō nō tāpia nō anā chaka shināpaima, māmāi noko Niospa ūiti fetsafaano. Mā nō askano Satanás afara anā noko chakafamapaiyaito, Niospa Fakekōichi Jesús noko ifixō noko kexesharatiro. Noko askafakē Satanás noko afeska fatiroma. **19** Mā nō tāpia nō Niospa fake. Akka fetsafāfe Nios nikakaspaifono, afo Satanás ato shināmani ūto ifo inōfo. **20** Niospa Fake nokoki oni. Noko tāpimaniyoi ūfe Apa nō tāpisharakōinō. Ūfe Apafi mēstekōi ikaki. Akka nō Jesús fe rafeax ūfe Apa feri nō rafetiro. Nā Jesucristo Niospa Fake. Nāri Nioskōi. Nāskakē noko nimapakexatiro. **21** Efe yora mīshitchi, Nios fisti Ifofakāfe. Satanás mato afara chakafamapaiyaito afe rafeyamakāfe. Askatari afara chakafo mā ifofapaikī afo shināyamakāfe. Nios fisti shinākāfe.

Nā tii ē mato kirika kenexō fomai, efe yora mīshitchi.

*Ēkīa Juan*

**Niospa meka fena Jesucristoõnoa  
New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaal], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
6c7b7ce2-9d87-5405-91e6-71ce1387adcc